


山陽縣志壹

地 170.177  
35  
=1-6



重修山陽縣志序

山陽在國初以前本無志其有志也自前縣江右湖  
口秦公凝奎始是為初志觀原序因考郡縣通志皆  
缺山陽不忍舉一邑之掌故永付塵劫莫可追尋乃  
廣諮博考旁寄耳目約略成書以事刊刻其集思廣  
益慘怛經營序中縷述甚悉山陽之得以有志者實  
自此開先厥功偉矣時康熙三十三年也自是以後  
歷任者多從未議及乾隆五十四年晉江林公聰於  
告歸卸篆時因初志已闕百餘年候代閒居徬前州  
刺史羅公文思續志體遠稽列史近採諸志旁訪紳  
士彙成績志甫脫稿為抄本三藏之州縣並儒學其  
意蓋有待也五十七年滋來蒞任視事之初即取閱  
初志見板已侵磨俱就模糊又闕遺多篇詢及紳士  
家藏舊本皆無完卷後得林公續志亦詳略失宜大  
半摘叙不無掛漏之嘆夫自康熙三十年以至乾隆  
六十年上下已越百年此百餘年中境內之人物風  
景日新月異不知幾更民間懿行善事踵前繼後不  
知幾輩欲誨其遺事率多依稀彷彿若再加以因仍

後益遠而難稽滋自到任以來見其人民龐雜急欲清剔風俗刁敝急欲整頓文風士習均須振興城垣堤塍皆賴修理一切應祀壇廟傾圮不堪留養棲流各所以及義塚率多未備審其先後緩急匍匐從事次第修舉迄今大局幸粗就矣又值年穀屢豐地方寧謐廼集紳士人等會議修志事均以為宜於是貢士孔榮宗崔應選廩生高景賢任灝劉鰲柳濡塘王寄訓王大猷王治洽生員李忠武紹文崔懷玠楊繼雲楊茂春何邦彥翟從珍何甲唐俊輝楊菁茂童生封於岐等分途採訪各據事實彙送查核特聘蒲城王君增第秉筆主修王君係乾隆辛卯鄉薦原選安定廣文曾署本縣學事滋與交甚篤知其學有本源適丁艱家居故得就聘參互考訂三閱月稿經數易而正本始成誠慎之也大要以初志為根底而加以損益以續志為附益而嚴其去取參諸州志商南雒南等志而辨其異同定其疑似紳士之搜羅故老之傳聞各以類附至若詩文傳記先後登錄俱經裁度共得十二卷有此志也即謂初志續志並存可也遂

名之曰重修山陽志特付棗梨以備志乘之一體云  
爾謹序

歲嘉慶元年仲春月文林郎知山陽縣事郢溪德夫  
氏何樹滋撰

山陽縣志原序

或問於余曰志也而必以初名其義何居余應之曰前無所因自我創始故也今上御極之初即命天下郡縣各修志乘上之史館會成一統志各直省郡縣守令奉命恐後靡不陸續告成越三十二年癸酉亥月六日奎始詣山陽任未浹旬訪求邑志於博士弟子員合詞對曰邑於前明成化年始設閱我朝纂修志乘之年諸務皆在草昧間即賦役沿革且無故府可循曷及全書奎因傷其人物山川不惠然告載

也踰月而有捧檄西安之役詢諸郡學得知康熙六年丁未郡志果缺山陽然陽志之缺實又不自丁未始蓋郡志創於明成化十一年乙未此時秦中尚未有山陽迄成化十二年丙申邑廼設迨嘉靖辛丑萬曆辛亥郡邑志又兩修而陽志猶寂寂焉無怪乎後起者之無所遵循也雖然自丁未至癸酉又二十七年矣若終令其湮沒則山陽之人物山川不且委諸扶桑咸池以外託之循蜚因提之前而漠然煙消耶奎乃仰維一統志之盛典毅然為陽邑任創始責而

竊病其創始之無階也夫輯志猶輯史然輯史者裨  
官黃衣揮人小吏各以耳目所該網羅成書邑志則  
不然兀坐齋中面墻而立於何徵文於何考獻創始  
者不幾憊乎曰不憊廣詢博採旁寄耳目故老荒唐  
堪作柱史宮娥白髮可列稗官以至斷碣殘碑名山  
別業悉佐見聞况奎齋中尚有秣陵梁子邑內尚有  
商洛李君通習掌故練達舊聞而是邑峩峩髦士霞  
蔚雲蒸又復討論者多途不翅觀射父左史倚相可  
以資奎之擷取者乃於政務鞅鞅之下載筆從事越  
數月而其役告竣爰手卷自誦見夫星野疆域田賦  
選舉大典畢具與夫風俗之醇厚藝文之陸離莫不  
人文兩宣用以搜黃圖之闕畧補青史之遺漏仰答  
興朝文恬武熙物與民胞之氣象而令觀者嘆山陬  
海澨靡有遺珠顧不休哉奎聞李唐新書成於趙宋  
之年維時宋祁為列傳范鎮討論異同吾吉州歐陽  
修載筆纂輯實總其成惟修於紀傳中並列姓名宋  
祁必心折服焉蓋不炫己而炫人古道猶照顏色是  
集也奎既採諸君子之長矣而尤借興浮白往來於

青齊之鄉襄陵之室捫虱尋思以出而全未見其憊也昔左太冲作三都賦構思十年門庭藩溷皆着紙筆偶得一句即便疏入且自以所見不博求為秘書郎及賦成而豪貴之家競相傳寫洛陽為之紙貴奎今者以雞肋微官紀載一隅自無煩十年構思之苦而數月中於簿書鞅掌之餘纂集成書缺畧者多踵事而增仰待後賢此區區以初志名編之意也夫

康熙三十三年甲戌相月中澣知山陽縣事湖口秦凝奎撰

山陽縣續志原序

聰聞古之君子一日居乎其位則必一日盡乎其事一日不能盡乎其事則一日不敢居乎其位又聞哲人之言曰此日間過與此生不學此身一失同為可惜蓋不獨難進易退儒者之所以自命實慮曠官素餐貽愧中心而陶士行衆人當惜分陰之語尤士君子所<sup>宜</sup>日加策勵者也聰於丁未之冬調任山陽戊申分校秋闈歸病足月餘雖力疾視事而案牘旁午瞿然曰是尚可以居乎其位哉奚爰請給將旋既卸篆候代未得歸則又瞿然曰如此日之間過何因思邑自康熙中前令秦公凝奎創為初志經今百餘年文獻無徵謀加纂集輯懼目力之不暇給也偶閱州志見羅公文思有續志之修因徬而為之遂稽列史近採諸志旁訪紳士彙成續編計得若干帙閱兩月始脫稿未及剞劂為抄本三藏之州縣及儒學山陬小邑絕少藏書僅就行笥所度畧為考訂而署中舊牘蠹蝕放失援據莫稽自雍正以前闕略殊多掛漏之譏知所不免惟是計此兩月間不至虛度光陰如昔

人之所云可惜間過者若夫盡乎其事必居乎其位  
余今已去位矣尚何所事然藉以補前之所未逮則  
則即是以為居位之盡事也可

乾隆五十四年元月望後七日在告山陽縣知縣晉

江林聰序

山陽縣志目錄

山陽縣知縣何樹滋纂修

卷一

疆域上

星野

沿革

方輿

增補八景附

卷二

疆域下

山川 嶺礪峪 古蹟 增補考辨附 市鎮 村庄 附

卷三

營建上

城池

衙署 倉庫附 壇廟 菴觀寺附

卷四

營建下

學校 社學社田附 營防 鋪遞附 關寨 增補橋梁附

卷五

典禮

秩祀 增補 儀節 增補

卷六

田賦

里甲

戶口

地丁

存運

支銷

稅課

卷七

職官

邑令 主簿附 教職 教諭附 典史 巡司附

武職 外委附

卷八

選舉

舉貢

封蔭

吏員

賓者

卷九

人物

宦蹟

忠孝

德義

貞節

仙釋

卷十

風土

習俗

節序

物產

卷十一

事類

紀事

祥異

卷十二

雜集

公牘

古體

詩選

山陽縣志

凡例十條

一初續二志初志始於秦令凝奎雖付剞劂率闕略不詳以冊籍久湮考覈無自雖極意搜羅不得不概存其略以俟後人續志則林令聰踵為之凡已入初志者不錄且倉卒編次原有未逮之志茲參互考訂勒為成書質諸二公毋鉛之苦意應亦首肯心折也

一初志作於康熙三十年至乾隆五十四年乃有續志相距已越百年創始者本求增訂於後人補綴者不克告成於前人是亦邑乘絕續之一大關也拮据從事用觀厥成非敢與前人競長亦庶幾無愧於職守已耳

一邑舊屬商州後改隸西安府自州改直隸縣專屬州故凡志中云府志俱指西安言云州志俱指商州言也至邑初續二志初為秦志續為林志紛見錯出仍標原名不敢掩長掠美

一初志綱領二十條細目至七十有餘紛紜錯雜全

無統紀續志定為十二目誠為簡括而輕重先後亦失倫次今於各條中或分或合或增或減分門依類悉為更正庶條理秩秩瞭如指掌

一是編以初續二志為藍本雖於各項事實不敢抹煞然詳所宜詳略所宜略修飾潤色原文十去五六以職司纂修勢難仍舊即所錄詩文亦半經改竄不忍為依樣葫蘆

一續志倣羅合江續州志前不綴序後不附論特以前有成書各項大意已弁總序嫌於重出在續志之體自應爾爾茲彙二志而集其成不得不變其例前序後論期於詳明雖細目尚須考論何況大

綱

一志近於史固貴簡而能該約而能詳然此說也在通都大邑則可若律之山陬僻壤則珥筆者索然興闌矣况邑乘經草創之後正須遐稽博考何事刻求苛責故徵文考度增補尤多

一貞節一類州志祇載已旌以昭公義而息浮言然已旌者不必悉合禮義合禮義者不必盡經表揚

况守節十年後俱得題請國家功令固不忍以沒世論定責之白髮青燈之孀婦故完節終身鄉評允協者悉為登載特冒濫者不與而旌不旌非所拘也

一志記藝文或闕乎興廢舉墜或係乎勸善懲惡俱因事附錄以便觀覽其無可附者則入雜集彙錄編末

一修志乘開局設館闕焉羣聚坐嘯畫諾人自為苟袁家自為政駿實則阿好私譽各懷意見昔人罪責譏

為家譜目為賑簿有由然也是編特絕是樊筆削纂次悉出蒲城王孝廉前署學事增第一人之手並無從中撓越阻撓者余虛心秉公折中一是總期有當於輜軒之採俾後之為劉知幾陳繼儒者免肆譏刺云爾

山陽縣志卷之一



山陽縣知縣何樹滋纂修

疆域志 上

山陽盤錯萬山間按之輿圖真黑子彈丸耳然郡縣星羅碁布雖犬牙相錯而各有封域所以重專守也鄉民沿山濱水坳墳<sup>培</sup>土石以力耕作較平原曠野膏土沃壤尤辛苦什伯其列宿躔次歷代因革與夫山川險夷戶籍登耗一切民風土物俱於是乎稽志疆域

星野

晉書雍於二十八宿為鶉首博雅東井謂之鶉首則秦分應屬井鬼山陽治屬西安南連楚之鄖陽鄖陽翼軫分野則山陽分野其在井鬼翼軫之間乎子安以翼軫為洪都誠訛矣<sup>初志</sup>

唐書天文志柳七星張鶉火也鶉火分野自華浦之交北負河南及漢柳在輿鬼東又接漢源當商洛之陽接南河上流<sup>州志</sup>

星野分於上河漢應於下商洛秦嶺以南之水滙入

鄖襄則興漢商洛均占柳星張分野於鶉火為長

州舊志

柳星張在南方七星之中自柳四度起至張十四度止為鶉火之次其形如鳥為朱雀禮記云前朱雀尚書云日中星鳥以殷仲春皆指此也其分國為周昔歲在鶉火武王克商而有天下歲者木星也在鶉火者木星躔於柳星張也天文書云扶風以西洛南陽以南為鶉火之次周家得歲所以克商今按商州為上洛本宏郡農東連楚西連秦在洛陽扶風之中正屬周之分野占柳星張無疑

州志

明史天文志陝西西安府之商縣華州之洛南皆張分續志

按續志以初志山陽與鄖陽最近分野并鬼翼軫之間尚未明晰當以明史張分為是然考晉志星野分度東井與鬼秦雍州柳七星張周三河翼軫楚荊州周禮保章氏註鶉火周也魏太史令陳卓柳七星張周三河宏農入柳一度晉書天文志河南入七星三度明大統律并九度至柳三度秦分雍州柳四度至張十五度周分三河詳考天文星